

農

候

雜

占

農候雜占卷三

福州梁章鉅撰

男恭辰校刊

晴雨

春雨乙卯夏糴貴夏雨丁卯秋糴貴秋雨辛卯冬糴貴冬  
雨癸卯春糴貴 開元占經引黃帝要經

春雨甲子赤地千里夏雨甲子乘船入市秋雨甲子禾頭  
生耳冬雨甲子牛羊凍死 此見朝野僉載其來最古  
其占亦最準赤地千里或作麥爛蠶死牛羊凍死或作  
雪飛千里 田家五行云赤地或作尺地言行者苦雨

尺地若千里也然則麥爛蠶死亦或作雨占歟 又云  
一說夏雨甲子主秋旱四十日蓋取久陰之後必有久  
晴諺云半年雨落半年晴亦此理也往年夏月忽值甲  
子日雨正以妨農爲憂老農曰喜遇雙日是雌甲子雖  
雨無妨後果少雨因考歲時雜占注云甲子值雙日多  
驗雙日少驗乃知老農之言有稽也迨至秋大收穫  
驟雨不終朝迅雷不終日又望雨看天光望雪看天黃  
並見月令廣義 按田家五行志引道德經亦云驟雨  
不終日故又有快雨快晴之語

雨住午下無數 田家五行志久雨後若午前少住午後雨必多引諺如此

春壬子雨人無食夏壬子雨牛無食秋壬子雨魚無食冬壬子雨鳥無食一云壬子雨更須看甲寅日若晴謂之拘得過則不妨一說壬子雨丁丑晴則陰晴相半二日俱晴六十日內少雨二日俱雨六十日內多雨 見田家五行故諺又有春雨壬子秧爛蠶死云云

春丙寅光無水下秧夏丙寅光曬殺秧娘秋丙寅光乾曬入倉冬丙寅光無雪無霜 此延建間土諺光謂晴明

謂丙寅日無雨卽成旱象也

春甲申雨主米貴秋甲申雨稻禾吐茅亦主穀貴 見道

山紀聞

冬雨是麥命春雨是麥病 樂清縣志引諺

甲午旬中無燥土 田家五行引諺 按吳下方言午作

子

甲雨乙拘 同上又云甲日雨乙日晴乙日雨直到庚又  
云庚辛自拘寅午不同又云久晴逢戊雨久雨望庚晴  
按吳下方言云甲子日雨乙酉晴乙日雨直到庚申

雨打六壬頭低田便罷休 同上又引諺云壬子是哥哥  
爭奈甲寅何謂甲寅可望晴也按農田餘話云世俗占  
候雨晴惟甲子壬子甲申甲寅四日最可憑

甲申猶自可乙酉怕殺我 田家五行云言申日雨尙庶  
幾酉日雨主久雨閩中見四時甲申日雨則富家閉糶  
價必踊貴也

初一下雨初二晴初二下雨不得晴 此通行諺或曰初  
三雨過月半或曰初二雨上半月皆雨十六日雨下半  
月皆雨頗有驗 田家五行亦云朔日晴主月內晴

日出早雨日出晏晴 農政全書載老農云言久陰之餘  
夜雨連旦正當天明之際雲忽一掃而捲卽日光出所  
以言早少刻必雨言晏者日出之後雲晏開也是日必  
晴非日出真有早晏也

雲籠日雨不止 見田家五行

開門落雨喫飯晴 此嘉湖俗諺謂春間清晨雨則午刻  
必晴也

閉門雨開門晴 田家五行云晏雨難晴俗謂之黃昏雨  
引諺云云

十日晴不厭一日雨便厭 同上凡雨喜少惡多

十日雨連連高山也是田 見明詩綜載廣信府田家諺

按辰州田家諺亦云云

大小漏天在雅州西北山谷高沈深晦多雨又黎縣多風  
俗謂黎風雅雨 見宋任弁梁益記

日頭暎晝大雨卽到 此福州諺故晝與到叶韻晝謂當  
午也久雨之日而當午忽現日光則仍雨也農政全書  
云凡久雨至午少止謂之遣在正午時遣或可晴午前  
遣則午後雨不可勝 按俗諺亦云日若當晝見三日



不見面

占鶴神 田家五行志鶴神己酉日下地東北方乙卯轉

正東庚申轉東南丙寅轉正南辛未轉西南丁丑轉正  
西壬午轉西北戊子轉正北癸巳上天在天上之北戊  
戌日轉天上之南甲辰轉天上之東己酉復下周而復  
始上天下地之日晴主久晴雨主久雨轉方稍輕若大  
旱年雖轉方天並不變諺云荒年無六親旱年無鶴神  
又吳下方言云風吹鶴神口米長千錢斗後有一條云  
纔逢癸巳上天堂己酉還歸東北方乙卯正東纔五日

庚申選上六朝藏離位丙寅坤辛未值丙之日正當彊  
壬午乾宮戊子坎對衝其位定相妨今以五行志校之  
乃知是論鶴神歌括

亮一丈下一丈 田家五行云久雨雲黑忽然明亮主大  
雨至又云病人怕肚脹雨落怕天亮亦謂天亮卽是雨  
候俄頃復雨耳

夏末秋初一劑雨賽過唐朝百斛珠 見羣芳譜天譜一  
說斛作圀

早禾壯宜白撞 見廣東新語凡暴雨忽作雨不避日日

不避雨雨點大而疎粵人謂之白撞雨引諺云云

丙丁相鬪拘戊己不同天 此建甯府諺謂丙丁戊己此

兩日晴雨往往不同也 福州亦有庚辛相拘之說

未雨先雷到夜不來未雨先風來也不凶 見古占雨語

以五卯日候西北有雲如羣羊者卽有雨 見師曠占

雨月額千里赤 金樓子余初至荊州時孟秋之月陽亢

日久月旦雖雨俄而便晴有人引諺云云蓋旱徵也

交月無過念七晴 農政全書引諺云云謂此日最宜晴

也又云廿七廿八交月雨初二初三忽肯晴 田家雜

占又云二十五日謂之月交日有雨主久陰

廿五廿六若無雨初三初四莫行船 田家五行云月盡

無雨則來月初必有風雨

久雨不晴且看丙丁 田家五行志引諺

久雨久晴多看換甲 同上

久雨逢庚必晴久晴逢庚必雨 此語到處有之庚取更

變之意往往有驗 或曰久雨逢庚單日晴久晴逢庚

雙日雨以單日屬陽於晴爲近雙日屬陰於雨爲近則

所占愈精矣按田家四時占亦云久雨望庚晴

逢庚則變遇甲方晴 范石湖大雨紀事詩或云逢庚變  
或云換甲始蓋用此諺 月令廣義又云逢庚隻變遇  
甲雙晴

西南陣單過也落三寸 見田家五行志言雲陣起自西  
南來者必多雨

每月廿四五間有雨往往成潦連至後月謂之騎月雨  
見陸放翁詩自注

太婆年八十八弗曾見東南陣頭發 見田家五行志言  
雲起自東南無雨又云千歲老人不曾見東南陣頭雨

沒了田

下旬雨不肯止 談苑云九江人最畏下旬雨引諺云云

陰天卜晴 諺云朝要看頂穿暮要四腳懸又云朝看東

南晚看西北又云西北赤好曬麥 並見田家五行

戊午己未甲子齊便將七日定天機七日有雨兩月泥七

日無雨兩月灰 見楊慎古今諺

甲寅乙卯晴四十五日放光明甲寅乙卯雨四十五日看

泥水 同上

壬辰裝擔子癸巳上天堂甲午乙未雨茫茫 同上

執破無雨危成當災 同上

神農治天下欲雨則至五日爲行雨旬日爲穀雨旬五日爲時雨萬物咸利故謂之神 見尸子

漢書董仲舒止雨閉諸陰門縱諸陽門

管子云如天雨然澤下尺生上尺注澤從土降潤有一尺則苗從下生上引一尺

陰占

元旦晴主人安國泰歲豐寇息若三日無風雨而陰和不見日色一歲大美 見田家五行

正旦微陰主大熟 見羣芳譜

開歲微陰不雨法當有年 見陸游詩註

立春天陰東風吉人民安果穀盛 見臞仙神隱

自正月一日至八日爲雞狗猪羊牛馬人穀其日晴所主之物育陰則災 見東方朔占歲書 按占歲書莫知由來其說已見于論衡物勢篇及北史魏收傳遼史以



五日爲馬六日爲牛微異

雨水後陰多主少水高下田均大熟諺云正月陰坑好種

田 見臺笠須知謝眺詩連陰盛農節臺笠聚東菑

三月三日陰不見日主蠶大吉 見月令廣義

蘇州府志云四月十六日晴則旱雨則水惟陰雲爲佳

重午只喜薄陰但欲曬得蓬艾主豐 見四時雜占

熟不熟但看五月廿五六 見月令廣義又引諺云二十

五六陰沈沈穀子壓田塍按據羣芳譜五月二十六諺

云則此日陰沈沈穀子壓田塍專指二十六一日也

秋分要微雨或陰天最妙 見月令廣義

田家五行云雙日白露有雨不損苗惟單日白露雨則損苗如連陰則不爲害此日名天收

十月初一陰柴炭貴如金 玉芝堂談薈引諺

冬至西南風主久陰 見田家五行

十二月上旬酉日雨主冬春連陰兩月 見月令廣義

天將陰鳴鳩逐婦啼中林鳩婦怒啼無好音此土語也按梅堯臣詩天欲陰鶉鴒怒鳴鳩出又云楚人因此卜陰晴陰逐晴呼無定聲

土日多晴水日多陰 七修類稿引諺語而釋之曰土日  
其實得二數則地二已生火至水日其實得五數則天  
五已生土矣故土日多晴水日多陰

急脫急著勝如服藥 粵述晁錯曰粵地多陰少陽李待  
制曰南方地卑而土薄故陽氣常泄陰氣常盛陽氣泄  
故四時常花三冬不雪一歲之蒸熱過甚人居其閒氣  
多上壅膚多汗出腠理不密蓋陽不反本而然陰氣盛  
故晨昏多霧春秋雨淫一歲之閒蒸溼過半盛夏連雨  
卽復淒寒人易中溼肢體重倦多腳氣等疾蓋陰常盛

而然陰陽之氣偏而相搏一日之內氣候屢變故諺云  
云

日占

大司徒以土圭之法測土深正日景以求地中日南則景短多暑日北則影長多寒日東則景夕多風日西則景朝多陰 見周禮

日暈主雨 農政全書引諺 按田家五行云凡正月丙丁日暈主旱戊己日主水庚辛日主兵壬癸日主江河決四月占同

日暈黃主風雨時農田治 同上

南耳晴北耳雨日生雙耳斷風截雨 同上日生耳主晴

雨引諺云云又云若耳長而下垂通地則又名曰日幢主久晴

日沒臙脂紅無雨也有風 同上日沒返照主晴俗名爲日返陽又云日返陽明朝水沒路日打洞明朝曬背痛或問二候相似而所主不同何也老農云返照在日沒之前臙脂紅在日沒之後 按山海經注云日西入則景反東照故曰反景楊雄賦所謂倒景也尙書宅西曰昧谷寅餞納日屬之仲秋蓋倒景反照在秋爲多其變千狀有作胭脂紅者故諺云云

日頭楚雲障曬殺老和尚 田家五行志日自雲障起主晴引諺云云

烏雲接日明朝不如今日 同上引諺云云又云日落雲沒不雨定寒又云日落雲裏走雨在夜半後以上皆主雨此言一朵烏雲漸起而日正落其中者 按陸放翁詩頗憂晴夜雲吞日猶幸今朝雨壓風自注俗以黑雲接落日爲風雨之候

日落烏雲半夜楊明朝曬得背皮焦 同上言半天原有黑雲日落雲外其雲必開散明日必甚晴也

今夜日沒黑雲洞明朝曬得背皮痛 見田家五行亦云

日沒後返照曬得貓兒叫

日出早雨淋腦日出晏曬殺雁 同上引諺亦見鶴林玉

露 按羣芳譜引范石湖占雨詩注作曬殺南來雁

日初升有黑雲在上下如飛鳥花瓣狀本日申未時有雨

見測海錄

日出生紅雲日沒黑雲接有大風雨 同上

早間日珥狂風卽起申後日珥明日有雨午前日暈風起  
北方午後日暈風勢愈狂早白暮赤飛沙走石日沒暗



紅無雨無風返照黃光明日風狂 同上

雷掩日不動天色黃復赤皆主大風 同上

日落時西北方雲起重疊數十層如層巒複嶂各各矗起  
主大風大水應在七日之內暈主雨重亦然 同上

太陽未出將晨時看日邊黑雲如旗幟如山峰如陣鳥如  
龍頭如魚如蛇如靈芝如牡丹主當日下午雨或日上  
下有紫黑雲貫穿者應上午卽雨 見陶朱公書

月占

月離於畢俾滂沱矣 見詩經又春秋緯引古語月麗於畢雨滂沱月麗於箕風揚沙

月暈主風 農政全書引諺云何方有缺卽此方風來玉歷璇璣云凡孟月七日仲月八日季月九日之夜月暈不已三日內有暴風甚雨 田家五行云大風將至月暈重圓

月赤天將旱 同上又云月色鮮紅明日雷雨青色亦風初三月下橫雲初四日裏雨傾盆 同上云新月下有

黑雲橫截名曰繳雲不出三日有暴雨又云雲如人頭

在月旁白風黑雨

月仰船雨綿綿月挂弓晝夜雨 見樂清縣志

月暈上難盪漿月暈落好扞箔 同上

月如鉤米價貴月如衡米價平 見天文秘苑

月如彎弓少雨多風月如仰瓦不求自下 見江鄰幾雜

志又羅大經鶴林玉露王達蠡海錄皆引此諺

月偃偃水漾漾月子側水無滴 見玉芝堂談薈

月光生毛大水推濠 此湘邵間農謠

月照後壁人食狗食 田家五行云新月落北主年荒米  
貴引諺云云

月終歲無暈則天下偃兵 同上

月兒仰水漸長月兒昃水無滴 七脩類稿引此而釋之  
曰月有九行青白黑赤各二道皆出入於黃道之中不  
中而過南則爲陽道不中而過北則爲陰道行陽道旱  
行陰道水月借日爲光月生時如仰瓦是行陰道矣如  
弓絃戾樣是行陽道矣故知旱潦者以此

月上早好收稻月上遲秋雨徐 按謂六月十六日之月

亦見羣芳譜

月珥且戴不出百日主有大喜 見荊州占

月有圓光大如車輪者來日大風或三日後應之 見陶

朱公書

星占

星光閃爍不定主來日風星明滅不動主雨夏月星密主來日熱 見田家五行

凡星自東流向西來日有雨自北流向東連日雨不斷自北流向南來日陰而無雨自西流向東二日內有風自西流向北來日風雨交作自南流向東主旱自北流向西主水自東流向北主霧自東流向南主火自西流向南水旱災傷并自南流向西秋霜冬雪自東流向北七日內報盜賊 同上

孝經援神契歲星守星年豐又晉書天文志太白在南歲星在北名曰牝牡年穀大熟

二月昏參星夕杏花盛桑葉赤 見四民月令 按一作桑葉白又按學津討源本齊民要術桑作樅

春秋元命苞咸池主五穀其星五者各以其職以精委其地也

太乙一星乃天使之神主使十六神知風雨水旱兵革饑饉疾疫明而有光則吉暗則凶 見星經

八穀八星在垣外華蓋之西主歲豐凶土官也一主稻二

黍三大麥四小麥五大豆六小豆七粟八麻子明則八穀成暗則不熟 同上

天田二星在角之北主畿內之田火守之則旱水守之則潦 同上

箕四星狀如簸箕明大而直則五穀熟箕口歛則雨開則風箕以簸揚調弄爲象又爲播揚五穀之器詩曰維南有箕不可以簸揚 同上又按荊州星占箕星一名卷舌動則大風至

杵三星在箕南主杵臼之用縱主豐橫主饑糠星在箕口



前主簸揚糠粃明潤則豐熟不見人相食 同上

農丈人一星在南斗西南主稼穡明則天下大稔 按天元歷理農坐箕東繞箕偃仰東熟西饑南旱北水此星當入箕度 同上

九坎九星在天田南主溝渠水旱所以導達泉流星小而明則吉 同上

羅堰三星在牛東南亦爲拒馬主隄塘壅蓄水潦灌漑田苗明大則有水災黃河驟決 同上

丙杵三星在人星東旁主春糧儲正直與日星相當則吉

否則凶荒杵下四星爲曰覆則大饑 同上

天倉六星在婁南倉穀所藏也明大而戶開中多小星則  
豐稔多積聚其東南 四星曰天庾主露積場圃之所  
也 同上

胃三星鼎足河之次又名大梁天中府天庫密宮金星也  
爲天之廚藏五穀之倉明則五穀豐稔天下和平 同  
上 按天官書胃爲天倉又天皇會通云胃主五穀之  
府

四瀆四星在井南江淮河濟之精也明大動搖則水泛濫

同上

天罇三星在井東北主盛饘粥積薪一星在積水東備庖  
廚之用與積水相去五尺以內則禾茂年豐若相去一  
丈以外則凶荒 同上

陶朱公書曰金水二星初出初入之日多主風雨蓋月犯  
畢星分野必雨也又云月離箕宿則風月離畢宿則雨  
所謂箕畢好風雨也

# 斗占

夜占北斗若有雲氣蒼潤如魚龍鱗狀主當日大雨又北斗前方四星名魁有黑雲掩於斗口主當夜雨北斗後斜三星名杓第七星曰天罡星前黃氣明潤主來日雨 見陶朱公書

黃昏時看北斗上雲氣之有無如烏雲徧掩北斗主三日有雨斗閒或一二星被雲遮蔽主五日內有雨如斗中黑雲低而廣厚主當時有雨又云斗中有赤雲氣主旱諺云赤雲蔽斗明日大熱如黃雲昏黑蔽斗亦主多風

之象 見同上

白雲遮北斗明日天變應未申時斗下有白雲氣皓色如水明日大風斗上下有雲如飛絮止有大風斗中有雲如魚鱗明日變風雲斗下黑雲湧上者當夜風雨至如斗口有紫色黑氣三日後有雷雨青色應木日赤色應火日黃色應土日白色應金日黑色應水日雲氣與霞彩亦同驗斗下有電閃過斗及斗口者當夜有雨若閃不過斗應在明日黃雲貫斗亦主來日大雨白雲氣不過三日內黑雲貫斗卽日風雨最驗 見同上

## 河漢占

星者元氣之英水之精氣上浮宛轉隨流名曰天河又名雲漢銀漢天漢天津絳河明河更曰長河曰秋河眾星出焉 見楊泉物理論

天河從北極分爲兩條至於南極其一經南斗中過其一經東斗中過兩河夾天轉入地中過而下水相得又與海水合三水相蕩而天運之故激湧而成潮 見抱朴子 按此可與潮占條參看

爾雅析木謂之津箕斗之間漢津也注云箕龍尾斗南斗

天漢之津梁也

七夕天河去探米價回快米賤回遲米貴 見紀歷撮要  
去回謂隱見也 按七月七夕視天河顯晦卜價之豐  
歉蓋老農有驗之占云故諺又云日暈長江水月暈草  
頭空又按丹鉛總錄卷二十一詩話類子舊日秋成詩  
云草頭占月暈米價問天河卽用此諺語

王者有道則河繩直 見緯書

天河東西漿洗寒衣 見玉芝堂談薈

河射角堪夜作犁星沒水生骨 見四民月令 按田家

五行志引諺云河東西好使犁河射角可夜作上句謂  
田家二月二上工也

天河中有黑雲生謂之河作堰又謂之黑豬渡河黑雲對  
起一路相接亘天謂之天女作橋橋下濶又謂之合羅  
陣皆主大雨立至少頃必作滿天陣名通界雨言廣濶  
普徧也 見農政全書 按太平御覽引黃子發相雨  
詩天河中有雲如浴豬豨三日大雨蕭立等謂之黑豬  
渡河

熒惑火星也火星守天河及天河中星象稀少皆主旱辰



星水星也漢泊卽天河乃天之餘氣也水星守天河及  
天河中星象煩多皆主雨 見陶朱公書

風占

春己卯風樹頭空夏己卯風禾頭空秋己卯風水裏空冬  
己卯風欄裏空 此通行諺田家五行則單言乙卯風  
樹頭空乙字或是己字之誤

一場春風對一場秋雨 田家五行云春風多秋雨必多  
引諺云云

凡風單日起者單日止雙日起者雙日止 見田家五行  
西南轉西北搓繩來絆屋 同上引諺云云又云惡風盡  
日沒又云日出三竿不急便寬大凡風至日出之時必

略靜謂之風讓日并言隆冬之風

行得春風有夏雨 同上引諺云云言有夏時應雨可種  
田也非謂水必大又按後山叢談爲春之風數爲夏之  
雨數小大緩急亦如之

風急雨落人急客作 同上引諺云云又諺云東風急備  
蓑笠言必雨也

春風踏腳報 同上引經驗諺云云言易轉方如人傳報  
不停腳也一云旣吹一日南風必還一日北風報答也  
二說俱應

西南早到晏弗動草 同上言早有此風而晚必靜引諺云云

東北風雨太公 同上引諺云云言艮方風雨卒難得晴俗名曰牛筋風雨指丑位故也

南風尾北風頭 同上言南風愈吹愈急北風初起便大引諺云云

颶母 同上船家名曰破蓬挂葢言見此物則蓬必爲風所破 按國史補云南海人言海風四面而至名曰颶風颶風將至則多虹蜺名曰颶母然三五十年始一見

船舳風 田家五行云吳中梅雨過風彌日海人謂之船舳風是日船舳初回云此風與海棹俱至諺云白舳風雲起旱魃精空歡喜仰面看青天頭巾落在麻圻裏一說白棹作船舳無精字

五月有落梅風江淮以爲信風 見風俗通

六月秋極早收七月秋慢慢收 樂清縣志云此言秋早則多颶風也

六月西南天皎潔十二月西南天落雪 同上

礮車雲起舟人急避又云雲似礮車形沒雨定有風 田

家五行云此風候也按雲起下散四野滿目如烟如霧  
名風花主大風立至故諺云云蘇詩云今日江頭天色  
惡砲車雲起風暴作又按李國史補云暴風之後有礮  
車雲

夏至前芒種後西南風急名曰哭雨風主雨立至 見田  
家五行

西風吹過午三日內有火 此福州諺

甯下甲申雨莫發乙酉風雨下猶自可風吹餓殺我 樂  
清縣志云冬月最忌乙酉風

粵中瀕海多風正二三四月發者爲颶五六七八九月發者爲颶颶甚於颶而颶急於颶習海道者設爲占候之

法或按節序或辨雲物正月初四日爲接神颶初九日

爲玉皇颶

此日驗則一年皆驗

十三日爲關王颶二十九日爲烏

狗颶二月初四日爲白鬚颶三月初三日爲元帝颶十

五日爲真人颶二十三日爲媽祖颶

即天后誕辰也凡真人颶多風媽祖

颶多雨

四月初八日爲佛子颶五月初五日爲屈原颶十

三日又爲關王颶六月十三日爲彭祖颶十八日爲彭

祖婆颶二十四日爲洗炊籠颶

自十二日至二十四日皆大颶旬

七月

十五日爲鬼颶八月初五日爲大颶旬九月九日九降  
自初一日起至十八日  
止往往風迅發不常 十月初一日亦爲大颶旬十八  
日爲彌陀颶十二月二十四日爲送神颶舟行大洋颶  
可支颶不可支蓋颶散而颶聚也大約三月九月均多  
風故諺云三月三九月九無事莫到江邊走

正月初至八行船去還泊十三至十七觀燈雨最急 二  
月二與九元武風必有 三月三日晴還要過清明

五月端午前風高雨亦連 七月降黃姑望後風始和  
重陽前後三四日忌九廟風又曰九降風凡颶風多



挾雨九降風恆不雨而風 春暴畏始冬暴畏終南風  
多間北風少斷 以上俱見測海錄

冬南夏北有風必雨 田家五行志夏天北風主雨冬天  
南風主雪諺云云

朝三暮七晝不過一 廣東風土記云南中五六月多風  
迄七日止朝發或三日止暮發或七日止晝發不過一  
日耳大害農穡 按南越志南海熙安間多颶風颶者  
具西方之風也或曰懼風怖懼也將發則兆以斷虹時  
爲颶母初則自東而北而西而南乃止未止時三日鷄

犬爲之不甯甚至林宇悉拔覆舟殺稼

暴風不終日 田家五行志云凡風終日至晚必稍息

南風之時兮可以阜吾民之財兮 松窗夢語卷二蒲州

爲古蒲坂卽庾帝都鹽池所產爲形鹽又曰解鹽不俟  
人工煎煮惟夜有南風卽水面如冰實天地自然之利  
大舜撫絃歌風以阜民財正指此也

春分明庶風至正封彊修田疇立秋涼風至報土功祀四  
鄉 見易卦通驗

南中六月有東南長風俗號黃雀風時海魚變爲黃雀因

以名也 見風土記

河朔春時疾風數日一作三日乃止名吹花擘柳風 見

韻齋

立秋坤卦用事晡時西南涼風至黃雲如羣羊宜粟穀

見占候圖

陶朱公書云伏裏西北風主秋稻旱冬冰堅諺云伏多西北風到臘船弗通

青龍風急大雨將來朱雀風回烈日晴燥白虎風至必有雨霧元武風生雨水相尋 按寅卯時爲青龍巳午時

爲朱雀申酉時爲白虎亥子時爲元武隨時起風應於  
雨晴 見同上

雲占

雲行東雨無蹤車馬通雲行西馬濺泥水沒犁雲行南雨  
潺潺水漲潭雲行北雨便足好曬穀 農政全書引諺  
云云亦見四民月令 按中州方言亦云雲朝東一場  
空雲朝西觀音老母披蓑衣雲朝南水潭潭雲朝北乾  
硯墨 見鐵槎山房見聞錄又孔平仲談苑引占諺云  
雲向南雨潭潭雲向北老鸛尋河哭雲向西雨沒犁雲  
向東塵埃沒老翁

雲往東一場空雲往西馬濺泥雲往北好曬麥 見楊慎

升庵經說 按易曰密雲不雨自我西郊天地之氣東北陽也西南陰也雲起東北陽倡陰必和故雨雲起西南陰倡陽不和故不雨引諺云云是其驗也

京東一講僧云雲向南與西行則有雨向北與東行則無雨每試之絕有效驗

雲走邵陽曬破腦漿雲走安化衝爛新壩 此湘邵間農謠見沅湘耆舊集

旱年只怕沿江跳水年只怕北江紅 農政全書北江紅一作太湖晴上句言亢旱之年望雨如望恩纔見四方

遠處雲生陣起或自東引而西自西引而東所謂沿江跳也則此雨非但今日不至必每日如之卽是久旱之兆也澇年每至晚時雨忽至雲稍浮北似霞非霞紅光耀日雨必隨作當主夜夜如此直至大暑而後已謂之北江紅此吳語也故指北江爲太湖

魚鱗天不雨也風顛 同上此言雲細細如魚鱗斑者一云老鯉斑雲障曬殺老和尚此言滿天雲大片如鱗故云老鯉往往試驗各有準又云冬天近晚忽有老鯉斑雲起漸合成濃陰者必有雨名曰護霜天

黃雲覆車五穀大熟 見東方朔別傳

日旁雲氣青爲蟲白爲兵赤爲旱黑爲水黃爲豐 此事  
類賦載周禮保章氏以五色雲物辨吉凶之祲象又按  
易通卦驗云冬至日見雲迎送從其鄉來歲美人和又  
春秋感精符云南至有雲迎日者來歲大美

五卯日候西北有雲如羣羊者雨至矣 見師曠占按京  
房易飛候凡候雨有黑雲如羣羊奔如飛鳥五日必雨  
飾羅天海湖雲 謝華啟秀卷一風花下注云雲如斑駁  
形舟人謂之風花見濟北集諺云



京房易飛候曰有蒼雲細如杼軸蔽日月五日必雨

山雲蒸柱礎潤 見淮南子

四方有濯魚雲疾者立雨遲者雨少難至江漢雲疾駛者  
卽日雨 見黃子發相雨書

早看日出處有黑雲積土之狀主雨晚看日入處有黑雲  
氣狀如累孟疊疊而起主雨又云晨旦雲掩日當日主  
大雨 見陶朱公書

張仲才文始真經云五雲之變可以卜當年之豐歉  
旱雲烟火雨雲水波 見呂氏春秋

霧占

春霧花香夏霧熱秋霧涼風冬霧雪 此杭紹間諺花香

謂晴也

大霧三日必有甚雨雨未降不可冒行也 此事類賦引

帝王世紀語 按測海錄云霧三日濃必起狂風

江淮人以立春連三日看湖中霧氣高尺寸則水亦至其  
處如無霧必旱又以一九日占霧定四月之水二九日  
占五月三九日占六月四九日占七月五九日占八月  
以霧高之尺寸定水之有無及大小極驗 見月令廣

義

霽淞重霽淞窮漢置飯甕 曾子固齊州冬夜詩自注引  
諺云云以爲豐年之兆 按東坡除夜大雪詩施注引  
農諺作霜淞打霽淞窮漢備飯甕又見墨莊漫錄引齊  
魯人諺語冬月寒甚夜氣塞空如霧著於林木凝結如  
珠玉旦起視之乃薄雪也見睨乃消謂之霧淞升菴詩  
話作霜淞打雪淞堦戶錄雪作霜

一場冬霧一場春雪 此吳中諺

霧溝晴霧山雨 蜀語山頂霧曰山戴帽引諺如此凡霧

在山顛必雨按王充論衡云雲霧雨之徵也

十月沫露塘濫十一月沫露塘乾 田家五行云十月有霧俗呼爲沫霧主來年水大相去百有五日水至老農咸謂極驗或云霧著水面則輕離水面則重

丹山天晴時忽有霧起迴轉如烟不過再朝雨必降 見宜都山川記

五月有霧主水諺云五月有迷霧行舟不問路 見陶朱公書

六月有霧主旱諺云六月有迷霧要雨直到白露 見同

上按兩月相連所占不同如此

十一月有霧主來年旱月令云仲冬行夏令大旱 見同

上

臘月有霧露無水做酒醋 農政全書云酉日尤準主旱

引諺云云

霞占

早霞紅丟丟晌午雨瀏瀏晚了紅丟丟早晨大日頭 見

明楊慎古今諺

早霞暮雨晚霞晴 此通行諺孔氏談苑云京東人言朝霞不出門暮霞行千里言雨後朝晴尙有雨須得晚晴乃真晴也 按范石湖詩亦載吳諺云朝霞不出市暮霞行千里又沅湘農諺亦云朝霞雨漣漣晚霞火燒天按又云朝霞於雨後乍有則定雨無疑或本晴天隔夜雖無今朝忽有則斷之顏色倘間有褐色仍主雨滿天

謂之霞得過主晴霞不過主雨若西北有雲雨當立至  
故京師諺云火燒雲者晴雲燒火者雨

朝霞暮霞無水煎茶 農政全書言此久晴之霞主旱又  
云暮霞若有火焰形而乾紅者非但主晴必主久旱之  
兆 按朝霞晴作雨 見李嘉祐詩報雨早霞生 見  
耿漳詩落日燒霧明農夫知雨止 見儲光羲詩  
侵早火雲不過中晚來火雲一場空 此吳中諺亦謂朝  
霞則雨暮霞則晴也

元日日出時有紅霞主絲貴 見陶朱公書

虹霓占

蜩螗在東 見詩經謂虹霓也

朝隤於西崇朝其雨 見詩經多驗

虹霓者天之忌也又曰虹霓不出賊星不行 見淮南子

豆盧署曰夫虹霓天使也降於邪則爲沴降於正則爲祥

見祥驗集

東鸞晴西鸞雨 農政全書云虹俗呼爲鸞引諺云云又

諺云對日鸞不到晝主雨言西鸞也若鸞下便雨則還

主晴



雨久而晚見于東則晴晴久而早見于西則雨 見詩經

注又鄭元注日旁氣白者爲虹青赤者爲霓

虹霓紛錯陰陽之沴也 見宋務光論

東霓日頭西霓雨 同上引諺云云又諺云南霓刀鎗北

霓灾殃

霓者斗之亂精也斗失度則虹霓見 見春秋孔演圖

東扛日頭西扛雨 見傳家寶扛謂虹也 田家五行亦

云虹挂東一場空虹挂西雨瀾瀾

虹食雨主晴雨食虹主雨 見田家五行云萬歷壬寅六

月望日雨後偶出郊外忽東南鬚出旋爲雲蔽亟歸來  
抵舍大雨如注且連雨數日

虹下雨垂晴明可期斷虹早挂有風不怕 見測海錄

虹雙出色鮮盛者爲雄雄曰虹闇者爲雌雌曰霓 見爾

雅注 按霓亦作蜺常依陰雲而晝見于日旁無雲不  
見大陰亦不見率以日西見於東方四時常有之惟雄  
虹見藏有時

蔡邕曰陰陽不和則見爲虹虹有青赤之色輒與日相互  
朝陽射之則在西夕陽射之則在東大率又與霞相映

莊子曰陽炙陰成虹禮疏云日照雨滴則虹生蓋雲心  
漏日日腳射雲故虹明耀異常詩謂之蜺蜺其字從虫  
俗謂之蜺其字從魚又謂之旱龍依其形質而名之也  
五月二十九日有黑氣墮溫德殿東黑如車蓋騰起奮迅  
五色有頭體長十餘丈形完似龍占者以虹蜺對 見  
蔡邕奏議

正月至八月凡有虹見主米麥貴 見陶朱公書  
蜺蜺出自東無雨必生風 同上

雷占

凡雷初發聲微和者歲內吉猛烈者凶 見農政全書

當頭雷無雨卯前雷有雨 同上引諺云云吾閩有上晝

雷下晝雨下晝雷三日雨之諺與卯前雷有雨占同

未雨先雷船去步回 同上引諺云云主無雨 又見四

民月令 按凡雷聲響烈者雨陣雖大而易過雷聲殷

殷然響者卒不晴

未雨轟轟屏車莫停 徐禎稷恥言引諺如此喻成事者

後言也

雷聲浩大雨點全無 見五燈會元錄鼓山永安師語云  
今俗諺雷聲大雨點小本此

驚蟄前動雷一月斷火灰 見樂清縣志 按福州諺亦  
云驚蟄未至雷先起四十九日雨不止

春雷始發其聲拍拍格格歷歷者雄雷也旱氣也其聲音  
音依依大不震者雌雷也水氣也 見月令廣義又見  
師曠經

秋孛幌損萬斛 見范成大秋雷歎詩注

雷初發在北方歲吉 同上引臞仙占

正月一日雷則七月有霜二月一日雷則八月有霜 見  
談苑

雷發於春分前後一日主歲稔 見羣芳譜

春甲子雷五穀豐登 田家五行云發雷喜甲子日主歲  
熟秋雷忌甲子日主歲凶

八月一聲雷遍地都是賊 田家五行云八月內不宜雷  
引諺云云 按賊字叶作平聲當是北方之諺

雷從金門起上旬者田熟 見師曠占

九月雷主穀貴 見戎事類占

雷鳴雪裏主陰雨百日不止 見農政全書

梅雨雷低田拆舍回 月令廣義云言低田遇巨浸屋舍無用也大抵芒種後半月不宜雷謂之禁雷天故諺云云 田家五行云或言雷聲多及震響反旱往往有驗雷時不蓋醬俗言令人腹中雷鳴 見風俗通

積風成雷 見物理論

驚蟄前後有雷謂之發蟄雷聲初起從乾方來主人民災坎方來主水艮方來主米賤震方來主歲稔巽坤方來主蝗離方來主旱兌方來主五金長價一云未蟄先雷

須見冰 見陶朱公書

十月雷主疫 諺云十月雷路白雨來催又云正月雷多主  
人民不安 見同上

凡先雷後雨其雨小先雨後雷其雨大 同上

千里不同風百里不共雷 見王充論衡

雷耕 房千里投荒雜錄云雷入陰冥雲霧之夕呼爲雷  
耕晚視田中必有開墾之迹乃爲嘉祥



電占

電激氣也以爲鞭策 見淮南子

天笑 神異經注云笑者天口流火照灼今天不下雨而有電光是天笑也

南閃半年北閃眼前 楊慎補占陰晴諺詩電光分南北陰霽在俄晷自注引此二句半或作千言北閃必有大風雨也

電光東南明日炎炎電光西北雨下連宿 見廣輿記  
按杭州諺亦有南閃火門開北閃雨就來之語

電北來則南風起南風來則雨 見測海錄

寒露前後有雷電主來年有水 見陶朱公書

電收麥 酉陽雜俎云介休百姓夜止晉祠宇下有人叩  
門云介休王暫借霹靂車收麥遂見數人共持一物如  
幢授之扛上環綴旗旛十八葉每葉有電光起百姓遍  
報鄰村及午注雨如綆風雷震電凡損麥千餘頃

霜占

露凝爲霜 見蔡邕月令又按國語駟見而實霜實霜而  
冬裘具注云駟房星也

每年初下只一朝謂之孤霜主來年歉連得兩日以上主  
熟上有鋒芒者吉平者凶 見農政全書

春霜不出三日雨 此福州諺

穀雨前一兩朝霜主旱 見月令廣義

冬前霜多主來年旱冬後霜多主晚年好 見農政全書

春宜連霜 見樂清縣志又云冬忌單日霜曰孤霜連夕

則愈佳

秋霜白露下桑葉鬱爲黃 見古豔歌

布穀鳴小蒜成秋霜熟藝蠶足 見田家歲時占引諺

霜降而婦功成 見家語

卷簾莊秋冬不下霜 明詩綜諸城縣漢王山西南五里有卷簾莊雖嚴冬無霜降里諺云云

逸周書霜降之日豺乃祭獸又古今詩話北方白雁來則霜降謂之霜信

霜始降則百工休 見禮記月令

齊民要術云凡麥糝於十月十一月十二月凍樹日種之  
萬不失一注凍樹者凝霜封著木條也又云天雨新晴  
北風寒切是夜必霜

二月三月有霜主大旱 見陶朱公書

露占

立秋白露下 易通卦驗

露陰陽之氣也陰氣盛則凝爲霜雪陽氣盛則散爲雨露  
見大戴禮

觸露不掐葵日中不剪韭 齊民要術卷三種葵篇凡掐  
葵必待露解故諺云云

桓帝永康元年秋八月魏郡言嘉禾生甘露降 見後漢  
書

東方朔游吉雲之地漢武問之曰其國以雲氣占吉凶苦

樂之事吉則滿室雲氣五色照人著於草木皆成五色  
露味甘帝曰可得否朔乃東走至夕而還得元精青露  
盛之琉璃器以授帝帝遍賜羣臣得嘗者老者皆少病  
者皆愈 見洞冥記

春秋佐助期武露布文露沈注甘露降其國布散者人尙  
武沈重者人尙文

周處風土記白鶴性警至八月露降流於草葉上滴滴有  
聲則鳴又春秋元命苞云霜以殺木露以潤草又述征  
記作五明囊盛取百草頭露洗眼眼明

崑崙山有甘露以瑤器盛之如飴人君有盛德則下見

拾遺記

露爲上池水 史記扁鵲傳注上池水謂水未至地蓋承  
取露及竹木上水以和藥

天乳星在氐東北主雨露明則甘露降雨澤均 見星經  
並列星圖

黍心初生畏天露令兩人對持長索槩去其露日出乃止  
見齊民要術

背明國有含露麥穗中有露味甘如飴 見王嘉拾遺記



甘露淋漉以霄墜嘉穗婀娜而盈箱 見抱朴子

甘露時雨厥壤可游 見史記司馬相如傳

甘露降和花雪表年 見宋書樂志

雪占

農及雪澤 夏小正註澤釋也

要宜麥見三白 朝野僉載引西北人諺云云謂臘月有三番雪也 按農政全書云冬至後第三戌爲臘臘前三番雪謂之臘前三白大宜菜麥 又李壁注王安石雪霽詩亦用此諺又韓琦詩嘗聞老翁語一臘見三白是爲豐年兆占驗勝蓍策俱本此說

冬無雪麥不結 見種樹書

夾雨夾雪無休無歇 農政全書言雨夾雪難得晴也引

諺云云 按宋詩中亦有夾雪雨難晴之句又按丹鉛  
總錄天文類霄雪兩字音義各異霄音屑說文雨霓爲  
霄爾雅雨霓爲霄雪注冰雪雜下曰霄雪說文霰稷雪  
也詩補傳曰粒雪郭璞爾雅注謂雨雜下也雪初作未  
成花圓如稷粒撒而下杜詩所云帶雨不成花是也

冬雪年豐春雪無 見石成金傳家寶

臘雪是箇被春雪是箇鬼 此吳中諺 按種樹書云臘  
雪宜菜麥若立春後雪則不宜

凡雪日闇不積謂之羞明霽而不消謂之等伴主再有雪

又是來年多水之兆 見田家五行

雪至地三日內卽化者歲成民安七日不消者秋穀不成  
同上

正月雪等雪二月雨不歇 見樂清縣志

立春後遇火日雪則後一百二十日有疾風驟雨謂之雪  
報 見臺笠須知一作立春後遇何日雪則數至一百  
二十日後必有風名雪報風

取雪汁漬原蠶屎五六日和穀種之能禦旱故謂雪爲五  
穀精也 見汜勝之書 按齊民要術謂雪汁使稼耐

早冬令以器埋土中治以此則收十倍

董仲舒曰太平之世雪不封條彌毒害而已謝惠連賦云  
盈尺則呈瑞於豐年表丈則表沴於陰德

陶朱公書引農書云以雪汁浸種倍收且不生蟲

霰占

暴雪 詩先集維霰傳霰暴雪也箋雪自上遇溫氣而搏  
謂之霰又大戴禮云陽之專氣爲霰按釋名霰星也冰  
雪相搏如星而散

花雪 大明五年元日花雪降殿庭謝莊下殿花雪集衣  
還白上以爲豐瑞於是公卿並作花雪詩史臣案霰爲  
花雪草木花多五出花雪獨六出 見宋符瑞志

米雪 埤雅霰閩俗謂之米雪言其霰粒如米卽所謂稷  
雪是也今名湑雪亦曰湑雪白居易詩風飄細雪落如

米

雪前鋒 楊萬里詩雪花遣霰作前鋒  
執頗張皇欲暗空  
篩瓦巧尋疏處漏跳階誤到暖邊融

雹占

雹凍傷穀 見禮記

後漢書延光二年河西雹如斗安帝問孔季彥對曰此陰乘陽之徵又西京雜記董江都曰雹陰脇陽也 按左傳曰聖人在上無雹雖有不爲災

十六國春秋石勒時雹起西河界平地三尺行人鳥獸死者萬餘樹木摧折禾稼蕩然勒問徐光光曰去年禁寒食介推帝鄉之神故有此災

韓稜字伯師爲下邳令吏民愛慕鄰縣皆雨雹傷稼稜界



獨無 見東觀漢記

齊有山泉如井深不測春秋時雹從井出敗傷五穀以柴塞之則止

當雨不雨故反雹下夏雹者爲蝗蟲傷穀 見易緯

曾子曰陽之專氣爲雹氣化蓋沴也唐張鼎禦雹賦當純陽之用事有伏陰之相蒸

九月雨雹不利牛馬 見文林廣記

劉居中至嵩山見大蜥蜴數百皆長三四尺各飲冰入口卽吐雹如彈丸積之於側忽震雷一聲彈丸皆失明日

人言昨午雹大作於某地乃知蜥蜴所爲